

**Послѣдованіе молебнаго пѣнія ко Господу Богу нашему за  
Правителя и за люди, пѣваемаго во время брани,  
противъ супостатовъ, находящихъ на ны.**

**Благословившу іерею (предъ Литургіею), начинаемъ:** Слава Тебѣ,  
Боже нашъ, слава Тебѣ. Царю Небесный... **Трисвятоѣ, и [по] Отче**  
нашъ... **Іерей глаголетъ:** Яко Твое єсть Царство... **Чтець же:** Господи,  
помилуй, **12. Слава и нынѣ.** Приидите поклонимся., **трижды. Аще же**  
**кромѣ Литургіи, глаголемъ токмо**

**Псаломъ [142]:**

Господи, услыши молитву мою, внуши моленіе мое [во истинѣ Твоей,  
услыши мя въ правдѣ Твоей и не вниди въ судъ съ рабомъ Твоимъ, яко не  
оправдїтся предъ Тобою всякъ живый. Яко погна врагъ душу мою,  
смирїлъ єсть въ зѣмлю животь мой, посадилъ мя єсть въ темныхъ, яко  
мѣртвыя вѣка. И уны во мнѣ духъ мой, во мнѣ смятѣся сердце мое.  
Помянухъ дни древнія, поучихся во всѣхъ дѣлѣхъ Твоихъ, въ твореніихъ  
руку Твоею поучахся. Воздѣхъ къ Тебѣ рѣцѣ мои, душа моя, яко земля  
безводная Тебѣ. Скоро услыши мя, Господи, исчезе духъ мой, не отврати  
лица Твоего отъ мене, и уподоблюся низходящимъ въ ровъ. Слышану  
сотвори мнѣ заутра милость Твою, яко на Тя уповахъ. Скажи мнѣ, Господи,  
путь въ онъже пойду, яко къ Тебѣ взяхъ душу мою. Изми мя отъ врагъ  
моихъ, Господи, къ Тебѣ прибѣгохъ. Научи мя творити волю Твою, яко Ты  
еси Богъ мой. Духъ Твой благій наставитъ мя на зѣмлю праву. Имене Твоего  
ради, Господи, живиши мя, правдою Твоею изведеши отъ печали душу  
мою. И милостию Твоею потребиши враги моя, и погубиши вся стужающія  
души моеї, яко азъ рабъ Твой єсмь].

**Слава, и нынѣ.** Аллилуїа, аллилуїа, аллилуїа, слава Тебѣ, Боже, **трижды.**

**Посемъ:** Богъ Господь и явїся намъ., **со стихи, на гласъ 1.**

**Тропарь, гласъ тойже.**

Спаси, Господи, люди Твоя и благослови достояніе Твое,  
побѣды православнымъ христианомъ и Христіюлюбивому воинству нашему  
на сопротивныя даруя и Твое сохраняя Крестомъ Твоимъ жительство.

**Слава, тойже. И нынѣ, богородичень:**

Предстательство страшное и непостыдное, не презри, Благая, молитвъ  
нашихъ, Всепѣтая Богородице, утверди православныхъ жительство.  
Спаси Христіюлюбивое воинство наше, и подаждь Ему съ небесе побѣду,  
зане родила еси Бога, еди́на Благословенная.

## Та́же пса́ло́мъ 50:

Поми́луй мя́, Бо́же, [по вели́цѣй ми́лости Твое́й, и по мно́жеству щедро́тъ Твои́хъ очи́сти беззако́нїе мое́. Наипа́че омы́й мя́ отъ беззако́нїя моего́, и отъ грѣ́ха моего́ очи́сти мя́. Яко́ беззако́нїе мое́ азъ зна́ю и грѣ́хъ мой предо мно́ю е́сть вы́ну. Тебѣ́ Еди́ному согрѣ́шихъ, и лука́вое предъ Тобо́ю сотвори́хъ, я́ко да оправди́шия во словесѣ́хъ Твои́хъ и побѣ́диши, внегда́ суди́ти Ти. Се́ бо въ беззако́нїихъ зача́тъ е́смь, и во грѣ́сѣ́хъ роди́ мя́ ма́ти моя́. Се́ бо и́стину возлюби́лъ еси́, безвѣ́стная и та́йная премудро́сти Твоея́ яви́лъ ми́ еси́. Окропи́ши мя́ иссо́помъ, и очи́щуся, омы́еши мя́, и па́че снѣ́га убѣ́люся. Слу́ху моему́ да́си ра́дость и весе́ліе, возра́дуются ко́сти смире́нныя. Отврати́ лице́ Твое́ отъ грѣ́хъ мои́хъ, и вся́ беззако́нїя моя́ очи́сти. Сѣ́рдце чи́сто сози́жди во мнѣ́, Бо́же, и ду́хъ пра́въ обнови́ во утробѣ́ мое́й. Не отве́ржи мене́ отъ лица́ Твоего́, и Ду́ха Твоего́ Свята́го не отыми́ отъ мене́. Возда́ждь ми́ ра́дость спасе́нїя Твоего́, и Ду́хомъ Влады́чнимъ утверди́ мя́. Научу́ беззако́нныя путе́мъ Твои́мъ, и нечестивіи къ Тебѣ́ обратят́ся. Изба́ви мя́ отъ крове́й, Бо́же, Бо́же спасе́нїя моего́, возра́дуется язы́къ мой пра́вдѣ́ Твое́й. Го́споди, устни́ мои́ отве́рзеши, и уста́ моя́ возвѣ́стятъ хвалу́ Твою́. Яко́ а́ще бы восхотѣ́лъ еси́ же́ртвы, да́ль бы́хъ убо́, всесо́жже́нїя не благоволи́ши. Же́ртва Бо́гу ду́хъ сокруше́нь, сѣ́рдце сокруше́нно и смире́нно Бо́гъ не уничижи́тъ. Ублажи́, Го́споди, благоволе́нїемъ Твои́мъ Си́она, и да сози́ждутся стѣ́ны Іерусали́мскїя. Тогда́ благоволи́ши же́ртву пра́вды, возноше́нїе и всесо́жега́емая: тогда́ возложатъ на олта́рь Тво́й тельцы́].

**И по псалмѣ́ начина́емъ кано́нъ безъ ирмосо́въ, гла́сь 8.**

### Пѣ́снь 1.

**Ирмо́сь:** *Колесницегонителя́ фарао́ня [погрузи́ чудотвори́и иногда́ Моисе́йскїй же́зль, крестообра́зно порази́въ и раздѣ́ливъ мо́ре, Изра́иля же бѣ́глеца́, пѣ́шеходца́ спасе́, пѣ́снь Бо́гови воспѣ́вающа.*

**Припѣ́въ:** **Многоми́лостиве Го́споди, сокруши́ враги́ подѣ́ но́ги на́ша.**

Свѣ́дуще Твою́ неизрече́нную ми́лость и чело́вѣколю́біе, къ Тебѣ́ припада́емъ, еди́не Содо́телю: прѣ́зри, мо́лимъ Тя́, прегрѣ́шенїя на́ша и изба́ви лю́ди Твоя́, сопроти́вныя же на́мъ низложи́.

Я́ко дре́вле на Амали́ка, ми́лостиве Бо́же, да́ль еси́ побѣ́ду воево́дствомъ Моисе́я, уго́дника Твоего́, та́ко и ны́нѣ, мо́лимъ Тя́, Гла́ве Росси́и и воинству́ на́шему, побѣ́ду извѣ́стную на ви́димыя и неви́димыя враги́ пода́ждь.

**Сла́ва:** **Крестообра́зно простѣ́ртыма рука́ма Моисе́овыма си́лу Амали́кову побѣ́ждая низложи́вый, Бо́же, и ны́нѣ мо́лимъ Тя́, побѣ́ди, Ми́лостиве, востаю́щїя на ны́ сопроти́вныя полки́ и Кресто́мъ Твои́мъ воору́жи воинство́ на́ше на крестонави́стники.**

**И нынѣ:** Си́лою неизрече́нною Твое́ю, Многоми́лостиве Христе́, защити́ лю́ди Твоя́ отъ всякія напа́сти, на ви́димыя и неви́димыя враги́, Вѣ́рному воинству́ на́шему побѣ́ды да́руя, ра́ди Пречи́стыя Твоея́ Ма́тере и всѣ́хъ святы́хъ.

### **Пѣ́снь 3.**

**Ирмо́сь:** *Небе́снаго кру́га Верхотво́рче, Го́споди, и Це́ркве Зижди́телю, Ты́ мене́ утверди́ въ любви́ Твое́й, желáній кра́ю, вѣ́рныхъ утвержде́ніе, еди́не Человѣ́колю́бче.*

Неизрече́нною Твое́ю ми́лостію и неиглаго́ланнымъ милосе́рдіемъ Твои́мъ, Христе́, защити́ лю́ди Твоя́, дерзость вра́жію подѣ́ но́зѣ покая́ря воинству́ на́шему.

Яко́же дре́вле преда́лъ еси́, Бо́же, иноплеме́нниковъ вѣ́рному Твоему́ рабу́ Иису́су Нави́ну, та́ко и нынѣ́, Ми́лостиве, покори́ сопроти́вныя враги́ подѣ́ но́ги воинства́ на́шего.

**Сла́ва:** Не преда́ждь на́съ, Влады́ко, беззаконі́й ра́ди на́шихъ въ ру́цѣ враго́въ гнѣ́вомъ Твои́мъ, но ни́щихъ рабо́въ Твои́хъ моли́твы послу́шавъ, обрати́ я́рость Твою́ на ра́дость на́шу.

**И нынѣ́, [богоро́дичень]:** *Избáви на́съ, мо́лимъ Тя́, неизрече́нною Твое́ю ми́лостію, Влады́чице, лю́ди Твоя́, и окрыля́ющи, защити́, Тя́ бо по Го́сподѣ́ Бо́зѣ́ еди́ну и́мамы Засту́пницу.*

### **Сіе́ глаго́ли по 3-й и по 6-й пѣ́сни то́кмо:**

Спаси́ отъ бѣ́дъ рабы́ Твоя́, Ми́лостиве, я́ко усер́дно къ Тебѣ́ прибѣ́гаемъ, къ ми́лостивому Избáвителю, всѣ́хъ Влады́цѣ́, Го́споду Иису́су.

### **Посе́мъ глаго́летъ екте́нію:**

Поми́луй на́съ, Бо́же, по вели́цѣй ми́лости Твое́й, мо́лимтися, услы́ши и поми́луй.

### **Ли́къ: Го́споди, поми́луй, три́жды. Діако́нь:**

Еще́ мо́лимся о Вели́ком Госпо́дине и Отце́ на́шем Святейшемъ Патриархе́ (имя), о Госпо́дине на́шем Высокопреосвященнейшемъ митрополите́ (имя), честнемъ пресвитерствѣ́, во Христе́ диако́нствѣ́, о всемъ причте́ и лю́дехъ, Го́споду помо́лимся.

### **Ли́къ: Го́споди, поми́луй, три́жды.**

Еще молимся о главе России Владимире и о еже даровати ему милости и щедроты со здравием и долгоденствием, и от всех сопротивлений видимых и невидимых врагов избавити, в мудрости и крепости духовней утвердити, молимтися услыши и помилуй.

**Ликъ: Господи, помилуй, трижды.**

**Таже прилагаемъ прошение сие:**

Господи Боже нашъ, сильный и крѣпкій во бранехъ, Тебе въ поможь недостойнии призываемъ и смиренно молимъ: прими оружіе крѣпости Твоея и щитъ защищенія, и избави; востани въ поможь нашу и изми мечъ прещенія и побѣды, и заключи сопротивъ ратующихъ и гонящихъ насъ; и возврати вспять со стыдомъ мыслящихъ намъ злая, подъ ноги вѣрныхъ Твоихъ тѣхъ покаяя, молимся Тебѣ, скоро, яко Щедръ, услыши и милостивно помилуй.

**Ликъ: Господи, помилуй, трижды.**

Господи Боже нашъ, призри съ небесе и виждь, яко сопротивнии наши мечъ извлекѡша и напрягѡша лукъ свой сострѣляти нищія и убогія рабы Твоя и заклати правовѣрно Тебе славящія, и сілою Твоею вседержавною луки ихъ сокруши и мечъ ихъ скоро сотвори внити въ сердца ихъ, побѣду на ня и одолѣніе рабомъ Твоимъ даруя, молимся Тебѣ, Вседержавный Царю, услыши и помилуй.

**Ликъ: Господи, помилуй, трижды.**

Не на лукъ нашъ уповаемъ, ни оружіе наше спасетъ насъ, Господи, но Твою всемогущую поможь призываемъ, и на Твою силу дерзающе, на враги наша ополчаемся и имя Твое вѣрно призываемъ. Ты же воспяти и погуби ихъ и въ руки вѣрному Твоему воинству нашему подаждь, молимся Тебѣ, услыши и помилуй.

**Ликъ: Господи, помилуй, трижды.**

Посли стрѣлы Твоя, Господи, и смятеніе сотвори врагомъ нашимъ, блесни молнія и разждени я, послі руку Твою свѣше и потреби я отъ земли, и изми насъ и избави имене Твоего ради, молимся Тебѣ, услыши и помилуй.

**Ликъ: Господи, помилуй, трижды.**

**Іерей възгласъ:**

Яко милостивъ и челоуѣколюбець Богъ еси, и Тебѣ славу возсылаемъ, Отцу и Сыну и Святому Духу, нынѣ и присно и во вѣки вѣковъ.

**Ликъ: Аминь.**

## Съда́лень, гла́сь 7:

Цѣрковь вопіе́тъ Ти́, Христе́ Бо́же: на кипари́сь, пѣвкѣ́ и ке́дрѣ́ покланя́емый, побѣ́ды Христолюбивому́ воинству́ на́шему Кресто́мъ Твои́мъ на крестоненави́стники, Богоро́дицы ра́ди пода́ждь и поми́луй на́сь.

### Сла́ва, и ны́нѣ́, богоро́дичень:

Яко́ иму́щая милосѣ́рдіе на не́мощь на́шу и зря́щая су́щихъ на земли́, на бѣ́дствующія́ люди́ уми́лосѣ́рдися, благослове́нная Богоро́дице, пребу́ди же моля́щися, да не поги́бнемъ лю́тѣ́, и умо́ли, яко́ Чи́стая, ско́ро благопремѣ́ннаго Бо́га спасти́ся душа́мъ на́шимъ, Пресвята́я Дѣ́во.

### Пѣ́снь 4.

**Ирмо́сь:** *Ты́ моя́ крѣ́пость, Го́споди, Ты́ моя́ и си́ла, Ты́ мой Бо́гъ, Ты́ мое́ ра́дованіе, не оста́вь нѣ́дра Отца́ и на́шу нищету́ по́стыи́въ. Тѣ́мъ съ проро́комъ Авваку́момъ зову́ Ти́: си́ль Твое́й сла́ва, Чело́вѣколю́бче.*

Ты́, Влады́ко Бо́же, милосѣ́рдіемъ ща́дяй люди́ Твоя́, напа́стьми же и ра́тьми обра́ца́й ихъ па́ки къ Себѣ́, я́рость гнѣ́ва Твоего́ ны́нѣ́ укро́ти и утиши́, обрати́ же въ ра́дость печа́ль и ско́рбь на́шу, побѣ́ды на сопро́тивныя подава́я.

Не гнѣ́вомъ Твои́мъ, Христе́, обли́чи на́сь, ни я́ростию Твое́ю, Ми́лостиве, но щедро́ты Твоя́, Влады́ко, яви́ на люди́ Твоя́, низлага́я вра́жія нахо́ды (иконобо́рцевъ) и бра́ни всякі́я покаря́я подѣ́ но́зѣ́ воинства́ на́шего.

**Сла́ва:** Влады́ко Го́споди, руко́ю Твое́ю все́ильною во глубинѣ́ погрузи́вый фарао́на, Ты́ и ны́нѣ́ де́рзость крестоненави́дцевъ супоста́товъ си́лою Креста́ Твоего́, Христе́, разори́, презря́ грѣ́хи на́ша, яко́ еди́нь Благі́й, моли́твами Ро́ждші́я Тя́.

**И ны́нѣ́, [богоро́дичень]:** Ты́ еси́ по Бо́зѣ́ христі́аномъ Засту́пница, Пречи́стая, Ты́ страсте́й на́шихъ Цѣ́лительница, Ты́, Госпоже́, вели́кая во бра́нехъ Помо́щница. Тѣ́мже Тя́ мы ны́нѣ́ со́гласно мо́лимъ: Сы́на и Бо́га Твоего́ за ны́ умо́ли изба́вити люди́ Твоя́ отъ всякі́я бѣ́ды, да Тя́ при́сно велича́емъ.

## ПѢСНЬ 5.

**Ирмосъ:** *Вскую мя отринулъ еси отъ лица Твоего, Свѣте незаходимый, и покрѣла мя естъ чуждая тма, окаяннаго, но обрати мя и къ свѣту заповѣдей Твоихъ пути моя направи, молюся.*

Не поминай, Владыко, безчисленныя соблазны наша, но вскорѣ преложивъ ярость Твою на милосердіе, низложи враги вся, и люди Твоя сохрани милостию Твоею.

Призри, Милостиве, на люди Твоя, сущія въ страсти, и подаждь намъ свѣше Твою помощь, якоже иногда на Амаліка Моисею, угоднику Твоему, и укрѣпи воинов наших на враги, вооруженныя на ны.

**Слава:** *Укрѣпивый древле на гордаго Голіаѳа мышцу Давида, пророка Твоего, Ты и нынѣ, Владыко, укрѣпи Воинство наше, побѣду дая Ему на враги и низлагая сопротивныя подъ нозѣ их.*

**И нынѣ, [богородичень]:** *Тя едину Пречистую Заступницу и мамы непобѣдимую и наша грѣхи потребляющую, къ Нейже вопіемъ, припадающе: избави насъ, Госпоже, отъ всѣхъ бѣдъ и золь.*

## ПѢСНЬ 6.

**Ирмосъ:** *Очисти мя, Спасе, многа бо беззаконія моя, и изъ глубины золь возведи, молюся, къ Тебѣ бо возопихъ, и услыши мя, Бже спасенія моего.*

Избавлей, Владыко, въ скорби сущія люди еврейскія и Сампсону подавый крѣпость Твоею силою, Ты и нынѣ, Милостиве, избави люди Твоя отъ брани сопротивныхъ и покори я подъ нозѣ Вѣрнаго воинства нашего.

Дивенъ еси, Бже, Твоею всеильною десницею избавляяй люди, ратию одержимыя, все бо рука Твоя можетъ. Тѣмже и нынѣ молимъ Тя: избави насъ и Русь отъ врагъ нашихъ.

**Слава:** *Окомъ Твоимъ всевидящимъ видя наслѣдіе Твое, Бже, отъ сопротивныхъ насилуемо, умилосердися, Владыко, на люди Твоя, вражію же дерзость низложи и подъ ноги воинства нашего покори.*

**И нынѣ, [богородичень]:** *Ты держава еси непобѣдимая, Пречистая Богородице, Ты, грѣхъ ради нашихъ и страстей, праведнѣ насъ наказуеши, но молимъ Тя, Госпоже: избави насъ, люди Твоя, отъ всякія напасти и брани, и побѣду съ небесе подаждь, якоже иногда Константину, Христоролюбивому воинству нашему и всѣмъ людемъ Твоимъ.*

## Священникъ глаголетъ ектенію: Паки и паки...

### И по возгласѣ абіе кондакъ, гласъ 4:

Вознесыйся на Крестъ волею, / тезоименитому Твоему новому жителству, / щедроты Твоя даруй, Христе Боже, / возвесели нас силою Твоею, / Христолюбивому воинству нашему победы на супостаты даруя, / пособие имущу Твое, оружие мира // непобѣдимую побѣду.

### Посемь степенна 6-го гласа. Антифонъ 3-й:

Надѣющіися на Господа врагомъ страшни и всѣмъ дивни: горѣ бо зрятъ.

Въ беззаконія рукъ своихъ праведныхъ жребій, помощника Тя имѣя, Спасе, не простираетъ.

**Слава И нынѣ:** Святаго Духа держава на всѣхъ, Емуже вышняя воинства поклоняются со всякимъ дыханіемъ дольнимъ.

### И абіе прокимень, гласъ 4:

Господи, силою Твоею возвеселится царь\* и о спасеніи Твоемъ возрадуется зѣло. **Стихъ:** Желаніе сердца его далъ еси ему и хотѣнія устну его нѣси лишилъ его. **Посемь:** Всякое дыханіе да хвалитъ Господа. **Стихъ:** Хвалите Бога во святыхъ Его... **Священникъ:** И о сподобитися намъ слышанія святаго Евангелія, Господа Бога молимъ. Премудрость, прости, услышимъ святаго Евангелія. **Миръ** всѣмъ.

### Отъ Марка святаго Евангелія чтеніе. [Зачало 51.]

Рече Господь Своимъ ученикомъ: имѣйте вѣру Божію, амины бо глаголю вамъ, яко, иже аще речетъ горѣ сей: двигнися и верзися въ море, и не размыслитъ въ сердцѣ своемъ, но вѣру иметъ, яко еже глаголетъ, бываетъ, — будетъ ему, еже аще речетъ. Сего ради глаголю вамъ: вся, елика аще молящися просите, вѣруйте, яко приѣмлете, — и будетъ вамъ. И егда стоите молящися, отпускайте, аще что имате на кого, да и Отецъ вашъ, Иже естъ на небесѣхъ, отпуститъ вамъ согрѣшенія ваша. Аще ли же вы не отпускаете, ни Отецъ вашъ, Иже естъ на небесѣхъ, отпуститъ вамъ согрѣшеній вашихъ.

### И абіе, Слава, гласъ 6:

Отче, Слове и Душе, Троице Святая, очисти множества согрѣшеній нашихъ.

### **И нынѣ:**

Моли́твами Богоро́дицы, Милостиве, очисти мно́жества согрѣше́ній нашихъ.

Поми́луй мя, Бо́же, по вели́цѣй ми́лости Твое́й и по мно́жеству щедро́тъ Твои́хъ очисти беззако́нiе мое́.

### **Та́же пою́тъ стихи́ру сію́, гла́сь 4:**

Посо́бivый, Го́споди, кро́ткому Дави́ду побѣди́ти иноплеме́нника, / и Христолю́бivому воинству на́шему спобо́рствуй / и ору́жіемъ Креста́ низложи́ враги́ наша, / покажи́, Милосе́рде, на насъ дре́внiя Твоя́ ми́лости, / и да разумѣ́ютъ вои́стинну, я́ко Ты еси́ Бо́гъ наш, / и Тя́ призыва́юще побѣжда́емъ, / моля́щися (Тебѣ́) прилѣ́жно (и) Пречи́стѣй Твое́й Ма́тери / дарова́ти намъ ми́ръ и ве́люю ми́лость.

### **Свяще́нникъ:**

Спasí, Бо́же, лю́ди Твоя́ и благослови́ досто́яніе Твое́, посѣти́ ми́ръ Тво́й ми́лостію и щедро́тами, возвы́си ро́гъ христіа́нъ правосла́вныхъ и низпосли́ на ны́ ми́лости Твоя́ бога́тыя, моли́твами Всепречи́стыя Влады́чицы на́шея Богоро́дицы и Приснодѣ́вы Маріи, си́лою Честна́го и Животворя́щаго Креста́, предста́тельствы честныхъ небесныхъ си́ль безплотныхъ, честна́го сла́внаго проро́ка, Предте́чи и Крестите́ля Иоа́нна, святы́хъ сла́вныхъ и всехва́льных апо́столъ, и́же во святы́хъ оте́цъ нашихъ и вселе́нскихъ вели́кихъ учите́лей и святи́телей: Васи́лія Вели́каго, Григо́рія Богосло́ва и Иоа́нна Златоуста́го, и́же во святы́хъ отца́ на́шего Никола́я архіеписко́па, Мврликійскаго чудотворца́, и́же во святы́хъ оте́цъ нашихъ Мево́дія и Кири́лла, учите́лей Слове́нскихъ, свята́го равноапо́стольнаго Вели́каго Кня́зя Влади́мира, и́же во святы́хъ оте́цъ нашихъ, всея́ Росси́и чудотворцевъ: Петра́, Алексі́я, Іо́ны и Фили́ппа, святы́хъ сла́вныхъ и добропобѣ́дныхъ му́чениковъ, преподо́бныхъ и богоно́сныхъ оте́цъ нашихъ, святы́хъ и праведныхъ богооте́цъ Иоаки́ма и Анны, (и свята́го **[и́мярекъ], его́же е́сть хра́мъ**), и всѣ́хъ святы́хъ, мо́лимъ Тя́, многомилостиве Го́споди, услы́ши насъ грѣ́шныхъ, моля́щихся Тебѣ́ и поми́луй насъ.

**Ликъ:** Го́споди, поми́луй, **12.**

**Возгла́сь:** Ми́лостію и щедро́тами [и чело́вѣколю́біемъ Единоро́днаго Сы́на Твоего́, съ Ни́мже благослове́нъ еси́, со Пресвяты́мъ, и Благі́мъ, и Животворя́щимъ Твои́мъ Ду́хомъ, нынѣ́ и при́сно, и во вѣ́ки вѣ́ковъ.

**Ликъ:** Ами́нь.



## ПѢСНЬ 7.

**Ирмосъ:** *Божія снизхожденія огнь устыдѣся въ Вавилонѣ иногда, сего ради отроцы въ печи, радованною ногою, яко во цвѣтницѣ ликующе, пояху: благословенъ еси Боже, отецъ нашихъ.*

Престани отъ гнѣва и призри на скорбию одержимыхъ насъ, удобно бо естъ очима Твоима, Милостиве, живити и мертвити. Тѣмже умиленно вопіемъ Ти, Владыко: отецъ нашихъ Боже, благословенъ еси.

Согрѣшихомъ вси и беззаконовахомъ вкупѣ, щедроты же Твоя, Владыко, безуміемъ нашимъ обратихомъ на гнѣвъ, но ослаби, Долготерпѣливе, и страхъ Твой вмѣни въ покаяніе и избави насъ отъ сопротивныхъ лютаго обстоянія, вѣрно вопіющихъ Ти: отецъ нашихъ Боже, благословенъ еси.

**Слава, [троицень]:** Троицу Безначальную славимъ, во Единомъ Существѣ поклоняемую, Лицы же раздѣляемую, и свойствы, и имены: Отца Безначальна, и Сына Собезначальна, и Соприсносущна Пресвятаго Духа. Единице и Троице Пресвятаѣ, Божественною Твоею силою избави насъ, вопіющихъ Ти: отецъ нашихъ Боже, благословенъ еси.

**И нынѣ, [богородичень]:** Подвигни, Владычице, ангелы и архангелы, лики же пророковъ, апостоль и мученикъ согласно умоли Ти Сына Твоего и Бога, да избавитъ ны отъ страстей и брани всякія, Благословенная Дѣво, Госпоже Милостивая.

## ПѢСНЬ 8.

**Ирмосъ:** *Седмерицею пещь халдейскій мучитель, Богочестивымъ неистовно разжже; силою же лучшею спасены сія видѣвъ, Творцу и Избавителю вопіяше: отроцы, благословите, священницы, воспойте, людие, превозносите во вся вѣки.*

Кто изочтѣтъ, Христе, неизреченную Твою милость? Презираеши бо грѣхы кающихся, болѣзны же исцѣляеши, и брани вся мимоводиши, и безумныя укрочаеши страсти. Тѣмже молимся Тебѣ: Милостивый Владыко Человѣколюбче и Господи щедротъ, обрати ярость Твою въ милосердіе къ намъ.

Невидимыя и видимыя раждени враги наша рукою Твоею, Господи, и защити насъ, люди Твоя, побѣды, якоже древле Давиду и Иисусу Навину на иноплеменики, подаѣ нынѣ воинству нашему на вся борющія насъ супостаты.

**Слава:** Пророцы со апостола, мученицы со святители и преподобнии отцы со всеми святыми, молитву творите ко Христу за ны прилжно, да обратит ярость Свою на милость, победу подая нам на сопротивныя враги.

**И нынѣ, [богородичень]:** Избави насъ отъ бѣдъ, Богородице всепѣтая, молимъ Тя, люди осорбленныя безчисленными страстьми, Ты бо вся можеша у Безначальнаго Твоего Сына, Егоже безсѣменно во чревѣ зачала еси. Того убо, яко Мати милостивая, за ны умоли сохранити ны отъ всякия бѣды, да Тя непрестанно величаемъ.

### **Пѣснь 9.**

**Ирмосъ:** *Ужасѣся о сѣмъ небо, и земли удивишася концы, яко Богъ явися человекомъ плотски и чрево Твое бысть пространнѣйшее небесъ. Тѣмъ Тя, Богородицу, Ангеловъ и человекъ чиноначалія величаютъ.*

Удивишася, Христе, щедроты Твоя, яже на согрѣшшия Тебѣ показалъ еси исперва обильно. На няже уповающе, мы, грѣшнии, припадаемъ Ти и молимся: якоже дрѣвле ниневитяномъ, покаянія ради, гнѣва Твоего ярость на милость преложилъ еси, и намъ нынѣ благоутробіе и щедроты Твоя яви, да Тя непрестанно величаемъ.

Прими наша, Спасе, моленія, якоже дрѣвле пріялъ еси ниневитянь прошеніе слезное, плачь блудницы и воздыханіе разбойника на крестѣ, и избави насъ, люди Твоя, отълежащія брани, да Тя непрестанно величаемъ.

**Слава:** Яко очи рабовъ въ руку господій своихъ, тако всегда очи наши къ Тебѣ, Многомилостиве Господи Боже нашъ, призри убо милостивно на ны, и низложи сілою Твоею богопротивныхъ гордыню враговъ нашихъ, и подъ нозѣ Вѣрному воинству нашему тѣхъ покори, да Тя непрестанно величаемъ.

**И нынѣ:** Покори, Господи, молимъ Тя, подъ ноги воинства нашего сопротивныя враги, якоже дрѣвле Давиду, Сампсону и Гедеону безбожно хвалящіяся покорилъ еси, да Тя, единого Защитника нашего, непрестанно величаемъ.

### **Таже:**

Достойно естъ яко воистину блажити Тя Богородицу, присноблаженную и пренепорочную и Матеръ Бога нашего. Честнѣйшую херувимъ и Славнѣйшую безъ сравненія серафимъ, безъ истлѣнія Бога Слова рождшую, сущую Богородицу, Тя величаемъ.

**Трисвято́е, [и] по Отче** нашъ... **Священникъ: Я**ко Твое́ е́сть Ца́рство...

**И тропари́ сія, гла́сь 4:**

**К**о Христу́ Бо́гу ны́нѣ прилѣжно притеце́мъ, грѣшніи, и смире́нно припаде́мъ, пока́яніемъ вопію́ще изъ глубины́ душе́вныя: Влады́ко, Ты́ намъ помози́, милосе́рдовавъ на ны́, ускори́, я́ко изгиба́емъ отъ мно́жества грѣхо́въ, не отврати́ рабо́въ Твои́хъ тщи́хъ, развѣ бо Тебе́ ина́го бо́га не і́мамы.

**Сла́ва, гла́сь тойже:**

**Н**е умолчи́мъ и не престае́мъ никогда́же, Тво́рче нашъ, Божество́ Твое́ воспѣва́юще, мы́ недостойніи. Аще бо не бы́ Ты́ умилосе́рдился снѣти съ небесе́ и воплоті́тися на́съ дѣля, кто́ бы на́съ изба́вилъ отъ толи́кихъ бѣдъ? Кто́ ли бы́ на́съ сохрани́лъ до ны́нѣ свобо́дныхъ? Не отступі́мъ у́бо отъ Тебе́, Влады́ко, Твою́ Цѣрковь изба́ви отъ всякія бѣды́ и на́съ поми́луй, Еди́не во святы́хъ Почива́яй.

**И ны́нѣ, гла́сь тойже:**

**Б**огора́дованная Влады́чице, Препѣ́тая Цари́це, всѣ́хъ христіа́нъ Хода́таице и те́плая Моли́твеннице, прилѣжно раби́ Твои́ къ те́плому заступле́нію прибѣга́юще, мо́лимся: ускори́ на моли́тву и потщи́ся на умоле́ніе, я́ко изгиба́емъ отъ мно́жества грѣхо́въ и отъ вражі́ихъ обстоя́ній, и гнѣ́въ Сы́на Твоего́, праведнѣ́ на ны́ дви́жимый, на ми́лость претвори́, вся́ бо, я́ко Ма́ти, у Сы́на Твоего́ мо́жеши, еди́на Благослове́нная.

**Посе́мъ діа́конъ или́ пресви́теръ глаго́летъ ектенію́:**

**П**оми́луй на́съ, Бо́же, по вели́цѣй ми́лости Твое́й, мо́лимтися, услы́ши и поми́луй.

**Ли́къ: Го́споди, поми́луй, три́жды.**

**Е**ще́ мо́лимся о ми́лости, жи́зни, ми́рѣ, здра́вii, спасе́нии, посѣ́щенii, прощ́енii, благопоспѣ́шенii, окормле́нии раба́ Бо́жія **[и́мярекъ]**, и е́же сохрани́тися Державе́ Россiйстей и вся́кому гра́ду и странѣ́ [отъ гла́да, губи́тельства, тру́са, пото́па, огня́, меча́, наше́ствiя иноплеме́нниковъ и междуусобны́я бра́ни, о е́же ми́лостиву и благоувѣ́тливу бы́ти благо́му и челове́колюбиво́му Бо́гу нашему́, отврати́ти вся́кій гнѣ́въ на ны́ дви́жимый, и изба́вити ны́ отъ нале́жащаго и праведнаго Сво́его прещ́енiя и поми́ловати ны́].

**Ли́къ: Го́споди, поми́луй, три́жды.**

**Иере́й же глаго́летъ возгласъ́:**

**У**слы́ши ны́, Бо́же Спаси́телю нашъ, упова́ніе всѣ́хъ концевъ́ земли́ и су́щихъ въ мо́ри далече́, и ми́лостивъ, ми́лостивъ бу́ди, Влады́ко, о грѣсѣ́хъ нашихъ, и поми́луй ны́.

Милостивъ бо и человекѡлюбецъ Богъ еси, и Тебѣ славу возсылаемъ, Отцу и Сыну и Святому Духу, нынѣ и присно и во вѣки вѣковъ.

**По возгласѣ же діаконъ высочайшимъ гласомъ глаголетъ:**

Вонмемъ и во умиленіи сердца колѣна душь и тѣлесъ нашихъ преклонше, Господу помолимся.

**Іерей же абіе, со всякимъ умиленіемъ, со всѣми предстоящими  
преклонъ колѣна, чтетъ молитву сію о побѣдѣ на враги воемъ  
правовѣрнымъ:**

Господи Боже силъ, Боже спасенія нашего, Боже, творяй чудеса Единъ, призри нынѣ въ милости и щедротахъ на смиренныя люди Твоя, и человекѡлюбно услыши, и пощади, и помилуй насъ. Се бо врази наши собрашася на ны, еже расторгнути и погубити насъ и святыни наша. Ты же вся вѣдый, вѣси, еже они на насъ помышляютъ и яко не можемъ мы стати предъ лицемъ ихъ, аще не Ты поможеши намъ. Но, якоже иногда при Моисеи еврейстии людие, словеса Твоя, имъ реченная, (дерзайте, стойте и узрите спасеніе отъ Господа, еже сотворитъ вамъ днесь, Господь бо поборетъ по насъ,) услышавше, благодарни быша, и о насъ сия рцы и востани на помощь нашу, изсуни силы Твоя непобѣдимое оружіе и заключи сопротивъ востающихъ неправедно на ны, и изгнати насъ отъ одержанія нашего, еже далъ еси намъ во прѣжнихъ нашихъ, хотящихъ. И подаждь рабомъ Твоимъ, сопротивъ тѣхъ во имя Твое ополчающимся, дерзновеніе и крѣпость, силу и мужество. Положи лукъ мѣдянь мышцамъ воинства нашего, и даждь имъ защищеніе спасенія, и препояши ихъ силою на брань. Прими оружіе и щитъ, и востани въ помощь нашу, рцы души нашей: спасеніе Твое есмь Азъ. Да постыдятся и посрамятся ищущи душъ нашихъ, да возвратятся вспять и постыдятся мыслящи намъ злая, да будутъ предъ лицемъ вѣрнаго Ти воинства, яко прахъ предъ лицемъ вѣтра, и ангель Твой сильный да будетъ оскорбляяй и погоняяй ихъ, да приидетъ имъ сѣть, юже не свѣдаютъ, и ловитва, юже скрыша, да обыметъ ихъ, да падутъ подъ ногама рабовъ Твоихъ и въ пограніе воемъ нашимъ да будутъ. Ей, Господи Боже, Спасителю нашъ, Крѣпосте, и Упованіе, и Заступленіе наше, не помяни беззаконій и неправдъ людей Твоихъ, и не отврати гнѣвомъ и яростію отъ насъ, но въ милости и щедротахъ Твоихъ, яко Благъ, посѣти вѣрныя рабы Твоя, и подаждь воинству нашему, на Тя уповающему, побѣду на враги, якоже Моисею на Амалика, Гедеоу на Мадіама и Давиду на Голиаѳа, и инымъ многымъ рабомъ Твоимъ, не на оружія своя, но на Тебе, Истиннаго Бога, спасти могущаго уповающимъ, пресланая одолѣнія и побѣды даровалъ еси. И убо, якоже Авраамъ,

Іосифъ, Финеесъ, Іисусъ, Халевъ, Ілія, Ананія, Азарія, Мисаиль, Даніиль, и прочіи отъ рода и рода угодницы Твої, во искушеніихъ, скорбехъ, бѣдахъ же и тѣснотахъ, на Тебѣ и на милость Твою щедрую уповающе, не ослабѣша, иже не точію не оставлени быша, но паче и преславно прославишася. И мы, грѣшніи и недостойніи раби Твої, ничтоже благое предъ очима Твоима сотворшии, на щедроты Твоя самыя уповаемъ, вѣдуще, яко не въ силѣ констѣй, ни въ лыстѣхъ мужескихъ благоволиши, но въ боящихся Тебѣ и на милость Твою уповающихъ. Тебѣ боимся и въ Тебѣ все упованіе наше возлагаемъ, къ Тебѣ прибѣгаемъ, Тебѣ припадаемъ, къ Тебѣ руцѣ наши возводимъ и Тебѣ смиренно въ покаяніи молимся: помози намъ, Боже, Спасителю нашъ, славы ради имене Твоего, и избави насъ имене ради Твоего святаго, да не когда рекутъ врази наши: Богъ оставилъ естъ ихъ, и нѣсть избавляяй и спасааяй ихъ. Но Ты, Истинный Господи Боже нашъ, въ Негоже вѣруемъ и на Негоже уповаемъ, не посрами насъ отъ чаянія милости Твоея и сотвори знаменіе во благо, яко да видятъ ненавидящіи насъ и православную вѣру нашу, и посрамятся, и погибнуть, и да увѣдятъ вся страны, яко імя Тебѣ Господь и мы людіе Твої. Яви намъ, Господи, нынѣ милость Твою и спасеніе Твое даждь намъ, возвесели сердце рабовъ Твоихъ о милости Твоей, порази враги наша и сокруши ихъ подъ ноги вѣрныхъ Твоихъ вскорѣ, обрати въ страхъ и бѣгство ихъ нечестивое и неправедное дерзновеніе, и даждь рабомъ Твоимъ во мнозѣмъ дерзновеніи, и силѣ, и мужествѣ погнати и постигнути ихъ, и о имени Твоемъ побѣдити и погубити я. Ты бо еси Заступленіе, Помощь и Побѣда уповающимъ на Тя, и Тебѣ славу возсылаемъ, Отцу и Сыну и Святому Духу, нынѣ, и присно, и во вѣки вѣковъ, аминь.

---

### **Сію ектенію глаголи на Божественнѣй Литургіи:**

**М**іромъ Господу помолимся.

**Ликъ:** Господи, помилуй.

**И прочая, даже до:** О плавающихъ...

**И абіе прилагаемъ сія:**

**О** еже не помянути грѣховъ и беззаконій нашихъ, но яко благосерду и милостиву намъ быти недостойнымъ рабомъ Своимъ, въ бѣдахъ сущимъ, и избавити Русь отъ враговъ ея, Господу помолимся.

**Ликъ:** Господи, помилуй.

О́ еже пода́ти си́лу и крѣ́пость хри́столюби́вому во́инству, и му́жественное и хра́брое сопроти́въ вся́каго врага́ и супоста́та всегда́ показати, и рабо́мъ Свои́мъ ми́ръ и утвержде́ние, и отъ всѣ́хъ бѣ́дъ, и ну́ждъ, и вра́жихъ навѣ́товъ ско́рое свобо́ждение дарова́ти, Го́споди помо́лимся.

**Ли́къ:** Го́споди, поми́луй.

О́ еже ми́ръ и сла́ву всели́ти въ земли́ на́шей, и изба́вити на́съ отъ всѣ́хъ вра́жихъ навѣ́товъ и бѣ́дныхъ нахожде́ний, Го́споду помо́лимся.

**Ли́къ:** Го́споди, поми́луй.

О́ еже не преда́ти на́съ въ попра́ние и разоре́ние враго́мъ и супоста́томъ на́шимъ, но въ бѣ́гство все́ дерзнове́ние ихъ претвори́ти, и мы́шцу ихъ сокруши́ти, и подъ но́ги вѣ́рныхъ Свои́хъ покори́ти, Го́споду помо́лимся.

**Ли́къ:** Го́споди, поми́луй.

О́ еже студа́ и безче́стия лица́ сопроти́вныхъ испо́лнити, се́рдце же ихъ стра́ха и у́жаса, и а́нгель Госпо́день бу́детъ погоня́яй и поража́яй ихъ, Го́споду помо́лимся.

**Ли́къ:** Го́споди, поми́луй.

О́ еже лу́къ мѣ́дянь положи́ти мы́шцы вѣ́рныхъ Свои́хъ и укрѣ́пíti десни́цу ихъ си́лою крѣ́пости Свое́й, въ побѣ́ждение и попра́ние враго́въ и супоста́товъ востаю́щихъ на ны́, Го́споду помо́лимся.

**Ли́къ:** Го́споди, поми́луй.

О́ еже премѣ́нити всю́ ско́рбь и сѣ́тование на́ше на ра́дость и весе́лие, и бѣ́дствовани́е въ тве́рдый ми́ръ, и непребори́мыхъ отъ всѣ́хъ вра́жихъ навѣ́товъ всегда́ сотвори́ти, Го́споду помо́лимся.

**Ли́къ:** Го́споди, поми́луй.

О́ еже сокруши́ти щи́тъ, ору́дие и бра́нь всѣ́хъ борю́щихся съ на́ми, и подъ но́ги хри́столюби́вому во́инству тѣ́хъ покори́ти, Го́споду помо́лимся.

**Ли́къ:** Го́споди, поми́луй.

О́ еже неосла́бну, непребори́му, побѣ́дительно́му же си́лу, крѣ́пость и му́жество съ хра́бростию хри́стоимени́тому во́инству на́шему на сокруше́ние враго́въ на́шихъ пода́ти, Го́споду помо́лимся.

**Ликъ:** Господи, помилуй.

О еже подати избаву вѣрнымъ рабѣмъ Своимъ отъ нашествія иноплемѣнникъ, и отъ всѣхъ бранемъ хотящихъ чловѣковъ и ратныхъ находѣній, и въ мирѣ глубоцѣ Церковь, и люди Своя соблюсти, побѣду имъ на враги всегда даруя, Господу помолимся.

**Ликъ:** Господи, помилуй.

О еже избавитися намъ отъ всякія скорби, бѣды, гнѣва и нужды, и отъ всѣхъ враговъ видимыхъ и невидимыхъ; здравіемъ же, долгоденствіемъ, и миромъ, и ангель Своихъ ополченіемъ вѣрныхъ Своихъ всегда оградити, Господу помолимся.

**Ликъ:** Господи, помилуй.

Заступи, спаси, помилуй и сохрани насъ, Боже, Твоею благодатию.

**Ликъ:** Господи, помилуй.

Пресвятую, Пречистую, Преблагословенную, Славную Владычицу нашу Богородицу и Приснодѣву Марію, со всѣми святыми помянувшѣ, сами себе и другъ друга, и весь живѣтъ нашъ Христу Богу предадимъ.

**Ликъ:** Тебѣ, Господи.

**Возгласъ:**

Яко подобаетъ Тебѣ всякая слава, честь и поклоненіе, Отцу и Сыну и Святому Духу, нынѣ и присно и во вѣки вѣковъ. **Ликъ:** Аминь.

**А по Евангеліи, на сугубой ектеніи, приложи ектенію, яже писана въ канонѣ по 3-й пѣсни: Господи, Боже нашъ...**